

BOSNA I HERCEGOVINA
FEDERACIJA BOSNE I HERCEGOVINE
TUZLANSKI KANTON
OPĆINSKI SUD U TUZLI
Broj: 32 0 St 447703 23 St
Tuzla, 22.01.2024. godine

Općinski sud u Tuzli, stečajni sudija Vedran Milašinović, u stečajnom postupku nad imovinom dužnika „HALIDović“ d.o.o. za proizvodnju, usluge i promet Gračanica, Pribava bb, u stečaju, dana 22.01.2024. godine, donio je sljedeće:

RJEŠENJE

Određuje se mjesečni bruto iznos nagrada za rad stečajnom upravniku Maji Musemić iz Tuzle u ovoj pravnoj stvari u visini od jedne prosječne bruto plaće isplaćene u Federaciji Bosne i Hercegovine za posljednji mjesec za koji budu objavljeni podaci u trenutku isplate.

Određuje se neto naknada troškova stečajnom upravniku Maji Musemić iz Tuzle u pogledu troškova korištenja mobilnog telefona i prevoza za potrebe preduzimanja radnji u svojstvu stečajnog upravnika u ovoj pravnoj stvari, u visini stvarno nastalih troškova.

Obrazloženje

Podneskom od dana 17.01.2024. godine stečajni upravnik predlaže da sud donese rješenje kojim će odrediti visinu nagrade za rad za stečajnog upravnika u ovoj pravnoj stvari, te odrediti naknadu troškova.

Podneskom od dana 19.01.2024. godine prijedlog je dopunjen u pogledu naknade troškova, sa navodom da se traži naknada troškova korištenja mobilnog telefona i prevoza za potrebe obavljanja stečajnog postupka u visini stvarno nastalog troškova.

Odredbom člana 77 stav 4 Zakona o stečaju (Objavljeno u "Sl. novine FBiH", br. 53 od 07.07.2021. godine) je propisano da nagradu i naknadu za rad stečajnog upravnika određuje stečajni sudija u skladu sa pravilnikom kojim se propisuju naknade i nagrade za rad stečajnih upravnika.

Određivanje mjesečnih iznosa nagrada za rad stečajnom upravniku je propisano odredbom člana 4 stav 1 Pravilnika o naknadama i nagradama za rad stečajnog upravnika i članova odbora povjerilaca („Službene novine F BiH“, br. 4/22 – u daljem tekstu „Pravilnik“), te je članom 4 stav 2 Pravilnika propisano da se mjesečni iznos nagrade iz stava 1 ovog člana određuje tako da nije veći od dvije prosječne bruto plaće u Federaciji Bosne i Hercegovine (u daljem tekstu: Federacija) u posljednja tri mjeseca.

Shodno odredbi člana 23 Pravilnika, isplata svih novčanih iznosa nagrada u skladu sa pravilnikom su bruto iznosi.

Cijeneći kompleksnost stečajnog postupka prema podacima sa kojima sud trenutno raspolaže (naročito imajući u vidu izvještaj o ekonomsko-finanjskom položaju stečajnog dužnika od 17.01.2024. godine), s obzirom na broj povjerilaca, imovinu stečajnog dužnika koju će biti potrebno unovčiti, da je pretežan dio imovine opterećen razlučnim pravima, procjenu o nemogućnosti nastavka poslovanja stečajnog dužnika i sve druge relevantne okolnosti, sud cijeni opravdanim da se u konkretnom slučaju stečajnom upravniku odredio mjesečni iznos nagrada za rad u visini od jedne prosječne bruto plaće u

FBiH, te je primjenom prethodno citiranih odredaba Zakona o stečaju i Pravilnika odlučeno kao u stavu I izreke ovog rješenja.

Odluku iz stava II izreke ovog rješenja, sud je donio na temelju odredbe člana 2 stav 1 Pravilnika kojom je propisano da je naknada novčana nadoknada za materijalne troškove (kao što su: troškovi prevoza, dnevnica, troškovi smještaja i sl.), koje stečajni upravnici imaju tokom stečajnog postupka.

Stečajni sudija
Vedran Milašinović

Pouka o pravu na izjavljivanje pravnog lijeka:

Protiv ovog rješenja je dozvoljeno izjaviti žalbu Kantonalnom sudu u Tuzli, koja se podnosi putem Općinskog suda u Tuzli, u roku od osam dana od dostavljanja rješenja.